



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8



**Taoba South Korea tir Yoon-i
pa aitsüba magizük**



**Archery World Cup: Dhiraj-i
bronze medal angu**

VOL. XXII ISSUE NO. 181 (ADOK 181)

DIMAPUR

SANGTENNÜ TUESDAY

RONGCHII (APRIL) 15, 2025

₹ 5.00

Deobarnü transfer orders agütsüba aitsür: NPCC

Dimapur, April 14, 2025 (TYO): Nagaland sorkar nung Department of Personnel & Administrative Reforms (Personnel 'A' Branch)-i Deobarnü sangdong kar agütsüba atema tebilemtsü abener ta Nagaland Pradesh Congress Committee (NPCC)-i metetdaksü. P&AR department-i April 13, 2025 Deobarnü aser talisa Khristantem atema temeshi anogo Palm Sunday nung sangdongtem agütsüba atema aoksar. 1963 küm Nagaland state akümba sülen tang mezüing atema transfer orders agütsüba atema shisabulua bilemer

ta Communications Department, NPCC-i ashi.

State sorkari nübortem asoshi bilema inyaksangshitsüla aser Nagaland sorkar ketdangsübaren ya Hindutva tangatetba mesüra RSS tetuyuba ama meinyaksüla kechiyong item ya Naga nunger den meputep ta NPCC-isa metetdaksü.

Tarutsü nunga iba ama meinyaksü atema Deobarnü agütsüba sangdongtem ajak meyipa agitsü mesüra reprangshitsü ayongzüker ta parnokisa ashi.

Health department nung 'no work, no pay' tenzüker

Dimapur, April 14, 2025 (TYO): Directorate of Health & Family Welfare nung mapa inyaktermi temelaba melii mapa inyaka maruba atema 'no work, no pay' tenzüka metetdaksüogo.

Department nung mapa inyaktermi temelaba melii mapai maruba, temelaba melii rotational duty inyakba aser pei teinyaksü mapa meinyakba ajanga Nagaland healthcare system inyaksangshi nung tetsükdaksü

ajurur ta Health & Family Welfare Director Dr. Mereninla Senlem-i ashi.

Department nung mapa inyaker ajaki pei lemezükba mapa inyaksüla aser tashi mangartem 'No Work No Pay' dena temerenshi alitsü ta Dr. Mereninla-isa ashi.

Dr. Mereninla-isa department kübok office tekolakpur ajaki regular attendance agitsü aser 'no work, no pay policy' tenzüksü tetuyuba agütsüogo.

Waqf Amendment Act ajanga mepetmesü adoker

Kolkata, April 14, 2025 (Agencies): West Bengal kübok Murshidabad nung Waqf (Amendment) Act atema raratep tulu adokba sülen South 24 Parganas nunga tanü Indian Secular Front (ISF) züngsemtem aser police tsüingda mepetmesü adoka raratepogo.

South 24 Parganas kübok Bhangar nung raradang nisung aika yiru aser police gari aika rongdoktsü. Ajisüaka West Bengal police-i Bhangar nung tensa azüoktetogo aser ozüing alema inyakterem anema ken o aika benokogo.

"Public-i olulu dak mamangtsüla. Osang tai prokshirtem dak ozüing tesashi agi merenshitsu" ta Kolkata police-i metetdaksüogo.

Kolkata nung aliba Ramlila Maidan nung Waqf (Amendment) Act anema rally ka nung adentsü atema ISF züngsemtem aodang police-i parnok noktanga liasü.

Basanti Highway nung Bhojerhat anasa police-i lungkak aiterem noktang. Idangji parnoki police-i atsüdanga aliba adena aotsü merang aser iba ajanga rara adok.

Lungkak aitertermi police gari kar nung mi senoktsü aser amakdang police kar yirutsü ta police ketdangsür kati ashi.

Ramlila Ground nung ayongzüka sentong atema police nungi temelaba maliba agi iba

sentong nung adeni aoertem police-i noktang ta osang ajanga ashir.

Ajisüaka, iba ISF party lennir aser Bhangar MLA Naushad Siddique-i Ramlila Maidan nung adenshia alirtem den jembi aser Waqf (Amendment) Act aitsü.

"Iba ozüing ya Muslim nunger anema dang masü saka Constitution nung kongshiba lir. Onoki iba Act magizüktsü. Iba amala ozüing pusemba sorkartem atsüngdoktsüla" ta MLA Siddique-i ashi.

BJP-i kin o kin tsüingda mangatettep adokdaksütsü meranger aser Trinamool Congress-i lungkak aitba alenbangtsü meranger ta ISF-i tai tongloktür.

"Chief Minister-i West Bengal nung Waqf law tasenba mapa metenzüktsü ta ashir. Onoki ibaji pelaa agizüker, saka kechiba police-i ozü züngsemtem timi agiba sentong nung medendaksür. Iba temeten ya Trinamool Congress atema dang asü?" ta Siddique-isa asüingdang.

Hokolbar aser Honibar anogotem West Bengal kübok Murshidabad nunga Waqf (Amendment) Act anema lungkak aitdang nübortem tsüingda mepetmesü adoka raratepa liasü.

Iba tatalokba ajanga Murshidabad kübok Samserganj nungi Hindu nunger 400 shi pei talidak toktsür Malda-i ogo ta osang angazüker.

CM Dr. Rio-i Nagaland Solar Mission tenzüksüogo



Dimapur, April 14, 2025 (TYO): April 14, 2025 nü Chief Minister, Dr. Neiphiu Rio-i Nagaland Solar Mission tenzüksüogo aser iba ya residential Roof Top Solar (RTS) amenoktsü atema lir.

Iba mapa ya Prime Minister Surya Ghar: Muft Bijli Yojana (PMSG:MBY) den liromedema tenzüker aser Power and Parliamentary Affairs Minister K. G. Kenye lia CM Rio-i mapa tenzüksüogo.

"Nagaland sorkari state nung power peria manguba tebilemtsü koktettsü atema solar mission tenzüko. State sorkari green energy revolution pusema nungittsü atema State subsidy talila agütsütsü lemtetogo aser iba ya 3Kw tashi atema Rs 50,000 agütsütsü" ta Dr. Rio-i ashi.

"State sorkari teyari talila agütsüba ajanga India sorkari PMSG: MBY kübok 2026-27

tsüingda mission mode nung 1 crore Roof Top Solar (RTS) amenoktsü alizüing ayuba atongtsü" ta pai ashi.

"State aser Centre sorkartemi subsidy agütsüba ajanga solar power amenokba jenjang ajemtsü. Pei pei kidang Roof Top Solar (RTS) amenokba nungi power anguba nungi grid nem agütsüba ajanga electricity bills ajema akümtsü" ta CM Dr. Rio-i metetdaksü.

Nagaland nung senso ajaki iba maongka agitsüla aser solar power production maparen nung yariteptsü ayongzüker, ta paisa ashi.

"Sorkari State subsidy talila agütsüsemba ajanga rooftop solar amenokba nung sen kanga maotsü aser Nagaland sorkari green energy revolution nükjidong yua aliba nung public-i shilem tulu agitsü" ta Power & Parliamentary Affairs Minister K

G Kenye-ia ashi.

Iba sentong nung Secretary, Power Department, Asangla Imti, IAS-i mapatong indang osang lemsatep aser ketdangsür kati Power Point Presentation sayu.

Iba sentong nung Deputy Chief Minister Y Patton, Chief Secretary Dr. J Alam, IAS, Home Commissioner Vyasan R, IAS, AHOds aser Power Department nungi tongti ketdangsürtem aden.

Iba scheme agitsü atema applications 247 aruogo aser tiptema enoktsü atema National aser State vendors 55 lir ta Power Department-i metetdaksü.

Tejangrartemi website www.pmsuryaghar.gov.in. mesüra helpline - + 9 1 9 3 6 6 9 1 1 1 7 6 , +917641007201 ajanga tongteprateptsü akok ta department-isa ashi.

'Joint inspection' masü tashi sen magütsütsüla: NFHRCC

Dimapur, April 14, 2025 (TYO): April 14, 2025 nü Dimapur nung Nagaland Foothill Road Construction Committee (NFHRCC) rongdak senden ka amendang Department dang joint inspection masü tashi sen magütsü atatsü mepishitsü lemtet.

Contractors/Firms ajak nem work orders 17 agüja aliba ama

mapa tenzükan ta Department of Public Works, Road & Bridges ayongzüksü atema NFHRCC-i senden nung bangjemtep.

PWD, R&B Minister-i ashiba ama March 5, 2025 nü MOU sign sütepa aliba ama bangdak department-i inyaksangshitsü atema parnokisa nenshia metetdaksü.

Parnokisa tapet mapang nung mapatong inyakba tesemtem nung joint inspection asütsü bangjemtep aser Committee o Department tsüingda mangatettep madoktsü atema joint inspection masü tashi Department-i senotsü magütsü atatsü mepishitsü lemtetogo ta Media Cell, NFHRCC-i sangdong ka nung ashi.

Assistant Professors 151 regularize asüba meyipa agitsüla: NSF

Dimapur, April 14, 2025 (TYO): September 11, 2024 nü state Cabinet-i Department of Higher Education kübok fixed pay nung inyaka aliba Assistant Professors 151 regularize asütsü lemtetba magizüker aser iba inyakyim aitsür ta Naga Students Federation (NSF)-i Nagaland Chief Secretary dangi shidi ka zülüogo.

Tesüiba nung NSF-i aiben tim mesü regularization asüba atema shiditem zülüogo aser yimjak nung sangdong balala agüja aruogo. Ajisüaka, Higher Education Minister aser State Cabinet-i iba tebilemba hao ta melii Assistant Professors 151 tashi regularize asütsü lemtetba ya taoksatsüka lir ta parnokisa ashi.

Item mapa inyaksü atema takotet nübo peria liaka aser timi toktepa mapa angutsü renemaka Department-i item kaketshirtem anema inyaksü mulungtetba aser iba tetuyuba meyiba magiba atema süngmanger, kechiyong NSF-i April 8, 2025 nü bangdak department den senden amendang iba onük lemsatepogo ta NSF-i ashi.

Tim masüba inyakyim ajanga sorkar mapa regularization asüba anema NSF-i küm aika jembia arur kechiyong iba ya Naga lanurtem asoshi lendong lir aser public-ia ketdangsübaren dak tamang makatsüsa akümer ta NSF-i metetdaksü.

State sorkar atema

Department of Higher Education ya kanga dang tongtipang kongsang ka lir ajisüaka tang lenisüba kübok department-i parnok nükjidong ayuba ama meinyaker. Department-i iba regularization asütsü mapa inyakba ajanga timi mapa nung aniokba tangatetba mali kümdaksüogo aser department asoshi tenüing menük bentsür aruogo ta parnokisa Chief Secretary dang ashi.

Anungji iba Cabinet lemtet meyipa agitsüla aser Nagaland sorkari item mapa ajak Nagaland Public Service Commission (NPSC) ket nung agütsütsü ayongzüker ta NSF-isa metetdaksü.

Fire Station Kiphire nung National Fire Service Week amunger



Dimapur, Rongchii/April 14 (TYO): Nagaland Fire & Emergency Service tetuyuba dak ajemdaker Fire Station Kiphire nung April 14 nü nungi tenzüka April 20 nü tashi National Fire Service Week amungtsü tenzüko. Iba hopta ya "Unite to ignite, a Fire Safe India" omen nung ajemdaker mungdar.

Mi nungi kümzüka alitsü aser

mi lendong nokdangtsü atema tangzüka agütsü nükjiong nung iba sentong ya agongzüka agir. Kasa mapang nung iba hopta ano kiojen aser tangar kümzüka mapang taküm bendanga agütsüba tasü tait fire fighter tem tushitsü.

Maneni Victoria Dock, Mumbai nung 1944 küm taküm samaba fire fighter parnok 66 nema commemoration parade

ajanga tetushi agütsü aser linük nung taküm samaba Fire service personnel tem nem minute ka ola madoki tetushi agütsü.

Fire personnel Kiphire-i, jila mereteta iba hopta tenzüksü aser iba sülen ZPC College nung fire evacuation drill ka agitsü aser April 17 nü Delux Point nung live demonstration ka sayutsü.

Raj Bhavan nung Dr BR Ambedkar asoba anogomung mungogo



Kohima, Rongchii/April 14 (TYO): Linük jung den külemi April 14 nü Raj Bhavan Nagaland nung Dr BR Ambedkar asoba anogomung mungogo.

Sentong agiba mapang naro ajanga lenir tushi aser pai linük asoshi teyari agütsübatem bilemtetshia tetushi balala agüja liasü.

Nagaland Angh La Ganesan, Raj Bhavan ketdangsürtem aser staff temi iba sentong nung shilem agia liasü.

PWD tem atema nüngja tapet amshitsü tuyu

Dimapur, Rongchii/April (TYO): Sub-Divisional Officer (Civil) Mon, Ajit Kumar, IAS-i Officer of the Commissioner, Nagaland tetuyuba dak ajemdaker tongtepratepba mapang aser kuli kakat nung Person with Disabilities tem atema nüngja tapet amshitsüba indang metetdaksüo.

Iba dak sendakba nung Mon district kübok Administrative

Officers ajak, Head of Departments/Offices Mon, Nagaland ajak, President, Konyak Union/ Konyak Nyupuh Sheko Khong/ Konyak Students' Union Mon, Nagaland dang ken o ya kanga junga asadanger Nagaland sorkari tuyuba ama official kuli kakat aser tongtepratepba ajak nung persons with disabilities tem atema agüja aliba nüngja tapet amshitsü mepeshia

metetdaksüo.

Nüngjatem:

1. "Divyangjan, Divyangta, Divyang" ya "Viklang, Viklangta" agi melentsü
2. "Persons with Disability" ya "Disabled" agi melentsü
3. "Mental Retardation" melena "Intellectual Disability" amshitsü
4. "Deaf and Dumb" melena "Hearing Impaired" amshitsü.

Mon nung Voluntary Teachers training agi



Dimapur, Rongchii/April 14 (TYO): Understanding Lifelong Learning for all in Society (ULLAS) kübok Mon District atema April 8 nü DEO Conference Hall, Mon nung anogo ka asoshi Voluntary Teachers (VTs) training ka agiogo.

Sentong ya Supervisor DEO Mon Sume lenisüba nung agi. Enibemo Shitio, DEO Mon-i ketdangsür, staff aser district kübok school balala nungi Voluntary

Teachers ajak pelashishia agizüka liasü.

Sentong nungsa Joint Director, DoSE Vizolie Chucha-i, 2023 küm tashi nungbo 100% literacy ajangzüksü India nükjiong lir, ta ashi. Paisa, 2011 census dak ajemdaker India sorkari centrally sponsored scheme ULLAS amenokogo ta ashi.

ULLAS ya shitakbabo voluntary sentong ka lir, saka Nagaland sorkari sorkar tesayurtem anismer iba

sentong ya benoka inyaksü atema telemtetba agiogo. Iba scheme ya linük nungi illiteracy agintsü atema lir ta pai ashi.

Chucha-isa, iba sentong ya tanga sentong ka ama dang magitsüla saka mission ka ama agitsüla ta ashi.

Maneni sentong nung Manyeh Supervisor DEO Mon-i tepela o jembia liasü. Training session ya Mary Konyak, ToT, EBRC Tizit aser Elizabeth, ToT, EBRC Mon nati agüja liasü.

Rural Library tem dang kakat agizüksü tuyu

Dimapur, Rongchii/April 14 (TYO): Director, Art & Culture, Adela Moa-i, Department of Art and Culture nung züngoksema aliba Rural Library ajak dang 2023-24 atema kakat April 16 nü nungi May 15 nü tashi nung office mapang Directorate of Art and Culture nungi agizüksü metetdaksüo.

Library ajaki Library Round Seal aser Designation Seal

(President, Librarian aser General Secretary) bener arutsüla, ajita mesüra kakat magütsü.

Tatembangbuba anogo süiba sülen kakat ya District Cultural Officers/Registering Officer-i parnok indang Head Quarter temi bener aotsü aser idaknungjiagi züngoksema aliba rural library temi kakat meshitsüla.


PM Internship Scheme atema metetdaksü

Dimapur, Rongchii/April 14 (TYO): Sub-Divisional Officer (Civil) Mon, Ajit Kumar, IAS-i, Directorate of Youth Resources & Sports, Government of Nagaland-i tetuyuba agütsüba ama Nagaland nung Prime Minister's Internship Scheme atema candidates mobilization asoshi jaokogo.

Iba dak sendakba nung District Employment Officer

Mon, Principal, Wangkhao Government College/ Mon Vale College/ Industrial Training institute Mon, Principal, Model College Wakching, Principal, Government Polytechnic College Aboi, President Konyak Students' Union Mon nung dang ken o kanga junga asadanger pei college/ Institution/jurisdictions nung iba osang metetdaksütsü mepeshia metetdaksüo.

Assam Rifles-i sentong balala ayongzüka agi



Dimapur, Rongchii/April 14 (TYO): Tzü mopung wazüka toksütsü aser lokti nem shilem agidaksütsü atema inyaka aruba nung shilem ka ama Assam Rifles-i, nüburtem den longjemer Nagaland nung kinük nung aliba tesemtem nung süngtong atemba sentong ayongzüka agiogo.

Kiphire District nung süngtong atemba sentong ayongzüka agiba mapang yimdaklirtem, kaketshirtem aser local lenirtemi kanga jangrabangra shilem agia süngtong 100 dak tema temja liasü.

Iba sentong ajanga tzmopung wazüka ayutsü koda tongtibang iba indang tangazükba agüja liasü. Maneni sentong ajanga security force aser nüburtem tsünga tesendaktep tajungba kümdaksüo.

Kasa mapang nung Assam Rifles-isa, April 14 nü Chakhabama nung security senden ka ayongzüka menogo, kong Kezo town, Kezoma, Kezo Basa, Sakhabama aser North Kikuma nungi Goan Burhas, Village Council Chairman, Council Secretary, Council züngsemtem aser lanur lokti

tentet tirtedensema nisung 21-i shilem agia liasü.

Security senden nung administration aser security dak sendakba nung onük balala sensaksema liasü. Assam Rifles-i iba senden ayongzüka atema yimtsüng balala nungi lenirtemi parnok dang kanga pelaba lemsatepogo, kechiyong iba ajanga nüburtem aser security forces tsünga tesendaktep akangshitsür.

Maneni April 14 1:00 ako meta Kiphire District kübok Longthongre yimtsüng anasa Kiphire-Tuensang lenmang nung gari ka tsükoker aliba agitettsü atema nüburtemi Assam Rifles dang teyari meshia liasü.

Osang angazükba sülen Assam Rifles-i takaratiba nung jenjang agia teküzmükertem gari tsükoka aliba tesemi yoka liasü. Tesem tonga aoba sülen lenmang tezülen gari ka meküpoka aliba nguteta liasü. Iba sülen AR team-i gari ya agitettsü. Tia ka-a lendong nung nisung yiruba osang kecha mali. Assam Rifles-i mapang shitak nung telangzüba agüja teyari agütsüba atema nüburtemi kanga pelaba lemsatepa liasü.



Beawar (Rajasthan), April 14, 2025: Hombarnü B.R. Ambedkar asoba anogomong nung Beawar nung tetsürtemi yimyim ayima shilem agiba noksa nung angur.

India-i mepishiba nung ajemdaker Belgium nung Mehul Choksi puogo

New Delhi, April 14 (Agencies): PNB bank loan ochimashi ken o dak sendakba nung jenshia senzür, Mehul Choksi Belgium nung puogo.

Sen crore 13,000 dak sendakba ochimashi ken o nung India nung bushisingdangba agency tem temepishiba nung ajemdaker Choksi apu, ta ketdangsertemi metetdaksü.

Central Bureau of Investigation (CBI) aser Enforcement Directorate (ED)-i mepishiba nung ajemdaker Choksi puogo.

Arrshi küm 65, Choksi yaküm Belgium nung lia angu. Medical treatment agitsü atema pa Belgium-i oa liasü. Pai India toktsür aoba sülen 2018 küm nungi pa Antigua nung alir.

Osang angazükba agi, International police-i pa aputsü anema 'Interpol Red Notice' agienba mapang nungi tenzüka CBI aser ED-i pa India-i anir

arutsü atema inyaker.

2018 aser 2021 kümtem nung Mumbai nung aliba special court kati pa anema 'arrest warrant' agütsür liasü, aser ibaji Indian agencies-i Belgium nung aliba agency tem den lemsateper liasü.

Pa Belgium nung apuba sülen paperwork dak sendakba maparen ajak inyakogo. Choksi-i pa temang majungba kuli nung ajemdaker bail temepishiba agütsüsüa akok.

Choksi indang lawyer Vijay Agarwal-i, Honibarnü (April 12) Belgian Police-i pa puogo, ta ashi.

Osangbenertem den jembidang Agarwal-i, "Tang pa jail nung lir, aser yangji (Belgium) inyakyim nung bail masü saka temepishiba agütsüsüa. Pa pua mayutsüla saka pa temeden atema jembitsü atema pa nem temelaba agüjang ta

mepishitsüla aser linüki meyipa yoktsü anema mepishitsüla," ta metetdaksü.

Paisa, "Choksi temepishiba tajemdakdakji, pa kanga shiranger aser tang cancer tashidak atema treatment tagidak lir," ta metetdaksü.

Paisa, iba ya yimtenren dak sendakba ken o ka lir aser India nunger jail temji meimchir alitsü atema majung, ta metetdaksü.

Mumbai nung aliba Punjab National Bank (PNB) indang Brady House branch nung loan ochimashi dak sendakba nung 2018 küm CBI aser ED nati Choksi, par kinünger Nirav Modi, kibong züngsemtem, bank nung inyakertem aser tangartem anema ken o benoka liasü.

Ano külen CBI aser ED-i mepishiba nung ajemdaker Nirav Modi-a 2019 küm nungi London nung aliba jail ka nung puoka lir.

Priyanka kinüngbu Robert Vadra-i yimtenren nung ajemoktsüa akok

New Delhi, April 14 (Agencies): Küm ishika tejaklen Congress MP, Priyanka Gandhi Vadra-i yimtenren nung ajemokba sülen tang la kinüngbu, Robert Vadra-ia yimtenren nung ajemoktsüa akok, ta osang ka ajanga metetdaksü.

Hombarnü Robert Vadra-i pai yimtenren nung ajemoktsü melungba lemsateper.

Congress party-i pa dak tamang katetra par kibong temoatsü nung pai yimtenren nung ajemoktsü ta pai metetdaksügo.

Robert Vadra-i, pai yimtenren nung ajemoktsü jangrabaji talisa pa Gandhi kibong den sendaktepba ajanga lir, ta ashi.

Paisa, tesüiba küm aika yimtenren party aikati yimtenren o entep nung pa dendaktsüner, talisa election agiba mapang nung mesüra mangatettep ken o adokba mapang nung pa tenüing tetshir, ta ashi.

"Ni yimtenren nung adenbaji ni Gandhi kibong nung züngsem

ka asüba agi dang lir. Ajisüaka tesüiba küm aika tsüngda party aikati kü tenüing tetshioigo aser yimtenren nung ajemokdaksütsü meranger, kechiyong election agiba mapang shia parnoki kü tenüing bilemteter. Mangatettep adokba mapang shia parnoki kü tenüing bilemteter," ta pai ashi.

Paisa, pa kinüngtsü Priyanka aser Priyanka adianu Rahul Gandhi na densema Gandhi kibong dang nungi pai aika angazükogo, ta ashi.

"Ni Priyanka mezüng Parliament nung züngsem kümdaktsünüa liasü, aser tang la züngsem kümogo aser lai kanga meranga inyaker. Ni la aser Rahul na den kibong nung ajak dang nungi aika angzükogo," ta pai metetdaksü.

"Congress party-i dang ni yimtenren nung adentsüla ta shira ni ozüng kibong temoatsü agia iba telemtetba agitsü. Kechisa ataloker aser koba temelenshisa nüngdakerari ni aika angateta lir, ta parnoki meteta lir," ta paisa shisem.

Muslim tsürtemi mepishiba ajanga Waqf ozüng yanglushi: PM Modi



April 14, 2025 nü Haryana kübok Hisar nung Ato kilonser, Narendra Modi-i Hisar airport nung terminal building tasenba semzüksüba sentong nung jembidang tangokba noksa nung angur.

New Delhi, April 14 (Agencies): Hombarnü Ato kilonser Narendra Modi-i, Muslim amitsür noklang aikati züluba shidi ajanga Centre sorkari Waqf kiojen ketdangsübaren ozüng ya yanglushitsüsa aküm, ta metetdaksü.

Haryana kübok Hisar nung sentong ka nung jembidang Modi-i, Waqf kiojentem junga ketdang asü asübo Muslim nunger lanurtemi chiyunga taküm alitsü atema cycle tyre teraksa yanglushiba mapa meinyakla, ta ashi.

Waqf (Amendment) Act, 2025 benokba sülen linük tesem aika nung Muslim nungertemi iba ozüng anema longkak aitba mapang nung pai iba o ya jembiogo.

"Muslim tsür amitsür noklang aikati India sorkar dangi shidi züluba nung ajemdaker sorkari iba onük atema o lemtepa aruba sülen tesüsa iba ozüng yanglushi," ta Ato kilonser Modi-i metetdaksü.

"Tangbo sensakertem anema inyakba anenadoktsü. Tetenzük nungi senotsüji ochishia amshi asübo ozü

Muslim lanurtem cycle tyre teraksa yanglua taküm mesüidaktsüla," ta pai ashi.

"Waqf ozüng tasenba kübok Adivasi meyong ali mesüra kiojenji Waqf Board-i agitsü makok. Sensaker aser Pasmanda Muslim nungertemi tajanzük angutsü," ta pai ashi.

Hombarnü Dr BR Ambedkar asoba anogomong nung Ato kilonser Modi-i Haryana kübok Hisar nung Maharaja Agrasen Airport atema foundation lung azüngtsüogo aser Hisar nungi Ayodhya tashi mezügbuba tayimtsü tenzükja liasü.

Congress lenirtem-a aija Modi-i, "Nenok melungjang nung Muslim nunger atema temeim tera danga lira kechiba nenoki Muslim nunger ka danga Congress Tir meshim?" ta asüngdang.

"Congress ya linük temzüng raksatsür ka kümogo. Dr BR Ambedkar-i ajak kasa züngshinüa liasü, ajisüaka Congress-i vote-bank politics mesen prok. Ambedkar-i sensaker ajak aser backward nübur ajak taküm akhümkata lidaktsünüa liasü," ta pai ashi.

South 24 Parganas nung longkak aitertemi police aika yirutsü

New Delhi, Rongchii April 14 (Agencies): Anogo ishika tejaklen West Bengal kübok Murshidabad district nung Waqf Bill anema longkak aйдang rara adokba sülen Hombarnü South 24 Parganas district nunga rara adoka police aika yiruogo.

Ketdangsertemi ashiba agi, iba Act anema longkak aitertemi police aika yirutsüogo aser tang tashi nung police-i nisung ana puogo.

Waqf Act anema longkak aitertemi police den rara aser gari aika rongdoktsü. Longkak aiter Muslim nungertemi gari lenmang-a aika mokdanga liasü.

Longkak aitertemisa police indang motorbikes nung mi senoktsü aser police bus ka meküpdoktsü.

Indian Secular Front (ISF) pusemertemi Bhangar kiyong nung police den raraa liasü. Longkak aitertemji Wafq Act

anema longkak aittsü atema Kolkata nung aliba Ramlila Maidan-i aoba mapang nung police den rara tenzüka liasü. Iba sentong nungji party MLA, Naushad Siddique-i o jembitsü sentong liasü, ajisüaka police-i iba sentongji agitsü memela.

Muslim nunger telok tuluka Ghatakpur nung adenshir Waqf Amendment Act anema longkak ait. Iba tesem nungjia police aika lezmükja liasü.



Murshidabad, April 14, 2025: Tawa Mushidabad district nung Waqf (Amendment) Act anema longkak aйдang rara adokba tesem nung tensa azüoktsü atema security sepaitem lezmükja aliba noksa nung angur.



TIR YIMYIM YIMOBILEM (EDITORIAL)

DIMAPUR TUESDAY, APRIL (RONGCHII) 15, 2025

Waqf Bill sülen Catholic Church dak rangloker

- P Tiamongba Aier

Parliament nung Waqf (Amendment) Bill 2025 agizükba sülen Catholic Church dak tenük yok tenzükogo kechiyong Rashtriya Swayamsevak Sangh (RSS) den sendaktepa aliba Organiser ta ser web portal ka nung tawa tu iba dak sendakba ocet ka zülüogo. "India nung shirnok ket nung ali teimba lir? Catholic Church vs Waqf Board atsütep" ta ser ocet ka nung Muslim Waqf boards aser Catholic rejutem ket nung aliba ali medemdanga zülua lir. Catholic Arogo ket nung ali 7 crore hectares shi lir ta parnoki ashir aser iba ya shitak süra India nung non-governmental ali kibur tulutibaji Catholic Arogo asütsü. Waqf (Amendment) Bill ajanga Waqf Act of 1995 nung temelenshi aika süogo aser Centre sorkar nem Waqf rongsen madak ketdangsütsü aser ken o tem angatetteptsü tashi agütsür. Waqf rongsen madak ketdangsütsü merangba atema opposition-i anir nisung aikati BJP sorkar aitsü saka BJP-i Parliament nung Kerala Catholic Bishops' Council-i iba bill pusema nungitba benoker Opposition den toktepa takok angu. Muslim nunger meying waqf property ya parnok tamangba yimsü, kakat shisatsü aser tenlatenji atema amshir aser Centre-i waqf boards madak ketdangsütsü tashi anguba atema nisung aikati aitsür. Ajisüaka, Parliament nung Waqf (Amendment) Bill agizükba sülen BJP-i Arogo rongsen reprangshimtsü tenzüktsü ama lir. Catholic Arogo meying ali Rs 20,000 crore shi indang lir ta Organiser web portal nungsa shia lir. Government Land Information website ajanga February 2021 tashi nung India sorkar indang ali 15,531 square kilometers aliba shia lir. Külen, Waqf board ket nunga state balala nung ali aika lir saka parnoki Catholic Church ket nung aliba ali memeneper ta Organiser.org nungsa shia lir. Catholic Church of India-i linük kübok tesem balala nung 7 crore hectares (17.29 crore acres) shi ali lir aser iba indang jenjang Rs. 20,000 crore shi asütsü ta parnokisa ashir. Catholic Church-i India nung ali alizükba mesüra anguba ya British nunger yimsüsüba mapang liasü aser parnoki tashishitsü keta ali madak kibur aküm ta Organiser.org nungsa shia lir. British sorkar ajanga lease nung ali agüja aliba ajak Arogo meying masütsü ta 1965 küm India sorkari sangdong ka agüja lir ajisüaka iba mapa shitak meinyakba ajanga Arogo kar ket nung ali aliba atema mangatettep lir ta parnokisa ashir. Centre sorkari Waqf ozüng yanglushiba sülen RSS den sendaktepa aliba web portal nung iba ocet züluba ajana Centre dang India nung Catholic Church meying ali reprangshimtsü ajungmesor ama lir aser iba ajanga yimtenren mapa, tamangba yimsü, aser ali kibur dak sendakba ken o tasen ka adoktsü akok.

OLEMSABANG

TANÜ ASEN NAGA LIMA TENSA TIA

~ L. Kika Pongener.

(Yashi adok nungi...)

Atangji, item osettsüset ajak jagi kodang bazar tongdir aser whole saler dokan tongdir, tsümar shishilembartemi telok balalai saru-saji aser temelen saru (tax) meshiba ajungaji osettsüset jenjang dak zükloker meshir, ibajagi osettsüset jenjangji kangasa talila atutsüsa akümer, aser idangji nuburtemsa akoksar. Ano aji dang masü, tsümar shishilembartemi tax katiba aser saru-saji tenung ademer osettsüset jenjang kecha hesap mali parnoki meshinutsü dang meshir, saka iba nungji Naga nunger takar-tulurtem karibo kecha mashishi-i dang, pei ket nung sen kar ta ser tenuk amour agütsür. Ajisuaka, nubur ajungaji kar amaji takar-tulur masü, mesura kar amaji yala-yashia angur/amshir masüji, takar-tulur kari kecha mashishi-i tenuk amour agütsüba jagi nubur ajunga timtemdaksür aser akoksadaksür. Ano aji dang masü, tsümar shishilempartemi jenjang tunudang ashiko, ketdangser/tulur kar nembo supokrema agüja alitsü akok, aser ibajagi osettsüset, chiyungtsü aser aonsotsü ajak nung jenjang parnok tunutsü tua alitsü akok. Aser ketdangser tulurtem supokrem agi tebang nembangtsüba agi, ashiko, parnoki mangu aser memetet amaitokja alitsü akok aser ibajagi nuburtembo akoksadaksür.

Linuk ka nung nuburtem nuchi tia nung alir ta ashitsüba, rongsenkettsüng jenjang junga alitsüla, nuburtem yimchi-yimjung nung sunepa alitsüla, nubur tsüngda tetsübutatenden kecha mekai sadok-sadoka alitsüla, aser nubur o nubur na tsüngda nung kati ka amokmerenba kecha meli-i sunep-sunepa alitsüla. Otsüla-oboula nungeri asen Naga lima India nunger talenba küpok timtema aliba tia nungi nuchiso angutsü atema machi-majem arema, sungo-lio mejaka, aya-tzüra aser timtem jenti arema, arem min, longren-lungbang, sungpok/longpok nung parnok ki kümer lia senzüa nuchiso bushiba mapa ya tenzük. Tanübo nujiso bushir linuk tenzükertem kar dak alaka teimba ka ki tajungtiba nung lia, Gari tajungtiba nung mener senzür aser rongsen manung jangradema alir. Ashiko, nuchisoji anguyunga tang aliba jenjang tang nungi kanga tajungbapo masütsü akok....Aji oda, küm paikati timtema rara-a arur, otsüla-oboula nunger mangdang metongteti, küm aika atsülanga aoba yagi nubur. Aji oda, linuk tenzükertem nukjidong meputepi telok aika küma lemsaba yagi tanü tashi telemtetba kati maruteti asen lima iba jenjang nung alir ta nuburtemi kanga sasaa bilemer.

Jokorla, asen Naga nunger nuburtemi kinuk-kisang ajungalen nungi ola adokbaji, kodang-ang saru-saji saruba ya anentsü ta yongyaseter. Pei nuburi pei nubur aser pei nisungi pei nisung adendena tsübuttsüsa amokmerentepba, nubur o nubur tsüngda kati ka dak tamang makatettsüsa aser kati ka dak temulong melemettsüsa, küm kwika iba tia nung timtema alitsü (?)...ta nuburtem nungnungteper. Asen nuburtemi asen nubur lisopur shishilembartem dang senotsü tamakhangtsü akhangba, aser temelen saru meshiba, ibajagi nubur tsüngda nung mangatettep aser rarabangsen adoker. Jokorla, nuburtemi India nunger nungi nuchiso angutsü yongyaba dang nungipo nubur o nubur tsüngda nung tetsübu tarendak melii sadok-sadoka alitsüba-ang teyongyaba kümogo. Aji oda, asen lima iba tia nung alitsüsa akümba ya kanga junga shisadanga, linuk tenzükertem aser tema sorkar nung sorkar tenzükertem aser nutsüng-nuburtem ajunga temelenshitsü karbo lir amai ajiteter. Anungji asen lima jungnura kati ka dak tai metongloktsüi asenok ajak melenshitsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Gaza nung Al-Ahli Hospital amakba Arogo lenirtemi aitsür



Palm Sunday (April 13, 2025) anogo nung Israel nunger missiles ajanga Gaza nung Arogoi ketdangsüba Al-Ahli Hospital poksatsür aliba noksa nung angur.

April 14, 2025: Palm Sunday anogo nung Israel nunger bomb ajanga Gaza nung Arogoi ketdangsüba Al-Ahli Hospital amak, aser iba tatalokba nung tanur ka asü.

Jerusalem nung diocese-i kasa anogo nungsa sangdong ka ajanga Israel-i missile ana amshia hospital amakba sashia aitsü.

Arogoi sangdong ajanga, "Amaktsü minute 20 jelia Israel sepaitemi ajak dang iba tesemji tangsa tokjang ta tuyua liasü. Kanga arisanga iba tesemji aienshitsuðang tamalen tekolak yirua alir tanur ka asü. Iba dak alia nisung asüba mesüra yiruba maliasü," ta metetdaksü.

2023 küm October ita nungi tenzüka tang agi pongubenbuba bomb amshia iba hospital amaker, ta Arogoi metetdaksü.

Tang tesüsa amakba mapang nung hospital nung genetic laboratory raksatsü, pharmacy ka tera raksa aser emergency-department buildings raksa. Iba dak alia hospital temeket nung aliba St Philip Tenla ki densema kiojen kar raksa.

Amongnü World Health Organization (WHO) director-general, Dr Tedros Ghebreyesus-i, Al-Ahli Hospital nung emergency room, laboratory, emergency room X-ray machines aser pharmacy ajak meshimeshia raksatsüogo, ta hospital nung medical director-i metetdaksüogo, ta ashi.

Israel nunger sepaitem tetuyuba nung hospital nungjagi shiranger 50 tanga hospital-i anir ao saka kanga mejungi shiranger 40 bo anir mouteti liasü.

Dr Ghebreyesus-isa, "Hospital ji süshitsüsa akümer, anungji shirangertem magizüksü. Hospital tem ya international humanitarian özüng kübok kümzüka ayur, anungji hospital tem amakba anentsüla," ta metetdaksü.

Taoba ita iba hospital nung medical director, Dr Maher Ayyad-i, hospital nung aliba ICU nungbo shirangertem sünga lir aser anogo shia outpatient clinic nung shiranger 500 nungi 700 tashi repranger, ta metetdakja liasü.

Amongnü Archbishop of York-ia, "Gaza nung Anglican Arogoi ketdangsüba Ahli Hospital ya taneptsü angudak aser Palestine nunger shirangertem anepaludak lir. Tesüiba ita 18 tashi raraba mapang nung iba hospoital nung doctor tem aser nurse temi timtem ajak aremzüka shirangertem yaria arudar," ta metetdaksü.

Paisa, "Palm Sunday ama anogo ka nung Gaza nung Khristan hospital ka dang aliba amakba ya aitsütsü tetemsü. Ni Diocese of Jerusalem nung Palestine nunger adianutem den iba tejashi lemsateper. Iba hospital nung staff tem, shirangertem aser asür kibong atema sarasademtsür," ta metetdaksü.

"Temeshi Hopta tenzüka mapang nung alima nung Khristantemi iba rara anentsü atema sarasademter. Palestine aser Israel nunger temeden, security, taküm akhümket aser yimjung atema ni sarasademtsür," ta paisa metetdaksü.

Hamas anema longkak aitba nung Khristantemibo shilem magir

April 14, 2025: Tang Beit Lahia densema yimti balala nung Gaza nunger meyrirjang aikati Hamas telok anema longkak aita arudar, ajisüaka Khristantemibo longkak aitba nungji shilem magir, ta Khristantemi metetdaksü.

Gaza nungertemi Hamas dang yimsüsüba menden nungi alung ta takhangba agütsür.

Hopta ana tejaklen longkak aitertemi "Hamas telok aienshiang", "Hamas ya onoki shimtetba telok masü" ta yimyim ayima longkak ait. Anogo asemnü parnoki longkak aitba sülen longkak aitba anena liasü, ajisüaka taoba hopta asentenshir longkak ait tenzükogo.

Israel aser Hamas na tsüngda rara tenzüka sülen Israel nunger sepaitemi Palestine nunger meyrirjang aika tepsetogo aser yimti aika meshimeshia raksatsüogo.

Hamas telok nungi sepaitem meyrirjang aika süogo aser lenirtema aika tepsetogo, ajisüaka tang tashi Gaza ya Hamas kübok lir.

Hamas telokisa parnoki pua

aliba nisung 24 chioktsü memelunger.

Washington D.C nung alir aser Palestine nunger Khristan, Ihab Hassan-i, "Nüburtemi longkak aitba ya Hamas-i tsübur," ta metetdaksü.

Hassan ya West Bank nung inteta liasü. Longkak aitba tenzüka sülen pai iba osang metetpelaa arudar.

Gaza nung nüburtemi Hamas anema longkak aityonga Khristantemibo longkak aitba nungji shilem magir, ta pai metetdaksü.

Gaza nung rara adokba sülen Khristantem aika jenogo aser tang noklang ishika dang anünga alibajia Tenla kitem nung jenoka lir.

Gaza nung Khristan 1,200 shi liasü ajisüaka rara tenzüka sülen Khristan 600-700 shi dang anüngogo, ta Palestine nunger Khristan, Khalil Sayegh-i metetdaksü.

Paisa, Gaza toktsür Egypt-i jena aoba Khristantem aikati meyipa arutsü tebilemba mali, aser Gaza nung anünga aliba Khristantema taküm January

ita nungi ita ana ceasefire mapang nung north tsütsülen pei kidangi meyipa ogo, ta metetdaksü.

Tangbo cease-fire tembangogo aser Israel-i aienshitsu tuyuogo, anungji Khristantem tejenokdak makai kümogo; tesüiba hopta nunga Israel sepaitemi anünglen nungi amakdang Khristan kibong ki ka raksatsüsogo, ta Sayegh-i metetdaksü.

Gaza City nung aliba Tenla ki asem nung Khristantem jenoka lir, ajisüaka Tenla ki ka nung jenoka alirtembo lendong nungi jenbua mali.

2023 küm October ita nung Israel sepaitemi anünglen nungi Saint Porphyrius Greek Orthodox Church amakdang Khristan 17 asü. Iba Tenla ki ya alima nung Tenla ki tejentibatem rongnung jenjang tasembuba nung liasü.

Sayegh-i, rara tenzüka sülen Khristan 30 süogo aser tebu-a Holy Family Catholic Church nung jenoka lia temelungjang tashidak agi asü, ta metetdaksü.

ANOGO ABEN TSÜNGREM DEN

Tangar Den Nokdakba

Ka dang nungi ana tajungba kechiaser parnoki inyakba asoshi taa tajung kar, kechiaser parnok alangra kati pa medemerji mesotsü saka kija alisang aiatai, kodang pa alangdir pa mesor shinga malitsü. Sayutsüngir 4:9-10.

Tetenzük nungi Tsüngremi Pa nübur kija alitsü majung ta ajitet (Lipok 2:18). Tsüngremi asenok yaritepa alitsü yanglu. Laishiba ajunga nung kija dang nungi teloki mapa tuluba inyaktetba Pai jembi. Tsüngremi asenok kija alitsü meyanglu, pei juri takok dang bushitsü Pai asenok meyanglu. Asenoki merangba nung takokji kati ka dak metaloka aliba ajanga angur. Iba jagi Pai arogoji tentet aser osangtajung prokshitsü asoshi tamangertem nem ain agütsütsü asoshi Tanela Temeshi yok. Asenok Tsüngrem yimli putirtem lir (1 Peter 2:9).

Kodang mepetmesü agi tongdir, kijai abentsü tasak. Saka asenoki teyariteper tembar yimtetta lira, parnoki ajungshiba aser teyari nungi asenoki tesünep aser tashi angur. Kati ka dak metaloktepa lira tatitangbai atitangdang asenok tekümsüker alir. Tatidang nung tsüker taküm kuliji shirnoki tangar den lungjema melii kija alir aser medemertemi züngoka malir parnokji asütsü.

Na khristan teloki züngdoka lira, Tsüngremi na asoshi kechi yanglu aji nai züdoker. Na temenen nung tsüktsü lendonga lir. Shirnoki Tsüngremi mulungba den sendaktepa alitsü bushir; shirnoki parnok den tesendaktep alitsü bushir parnok den tesendaktep alitsü nai bushitsüla. Tsüngremi nungloktsüba mapa inyaktsü asoshi tangar teyari bushir ka na süang. Na meketa alir shirnok teyari nüngdaka lir parnok yarir aser tajungshir ka na süang.

Mexico nung Khristantem anema inyakba kanga bulua kümogo

April 14, 2025: Mexico nung nung ozüng alema inyakba Khristantem anema inyakba mapatem ya tang tamajungba, kanga bulua kümogo; Khristan aser iba ya ajanga lenirtem kanga tepseter aser rongsenkettzüng aser loktiliba tesüiba küm trok tsüngda tensa kanga mejungi kümogo," Khristantem aika ta kasa osang ajanga amokmerenogo mesüra metetdaksü.

Khristantem ket nungi auyaogo. CSW Director of Advocacy, Anna Lee Stangl-i, 2018 küm nungi 2024 küm tsüngda Roman Catholic Arogo indang ministries balala nung inyaker 900 dak tali amokmerenogo, ta Khristan melungtet telok Christian Solidarity Worldwide (CSW)-i metetdaksü.

Taoba Tir, Andres Manuel Lopez Obrador yimsüsüba mapang nung (2018-2024) Roman Catholic putir 10 aser seminary student ka tepsetogo aser putir 14 bo tasü lendong nungi jenbuogo, ta kasa osang ajanga metetdaksü.

Yaküm October ita nung Claudia Sheinbaum-i Tir tenangzüka agiba sülen-a linük nung Khristan putir ka tepsetogo.

"Mexico nunger puti otsü

nung ozüng alema inyakba mapatem ya tang tamajungba, aser iba ya ajanga lenirtem kanga tepseter aser rongsenkettzüng aser loktiliba tensa kanga mejungi kümogo," ta kasa osang ajanga metetdaksü.

CSW Director of Advocacy, Anna Lee Stangl-i, "CCM-i tesüiba küm 35 tashi item ama osang bendena arur aser tawa Tir asem tashi yimsüsüba kübok putirtem aser yimsü lenirtem kanga bulua amakba ya tebilemtsü tuluka kümogo, aser iba tensa ya tajungba makümer," ta ashi.

"Onoki CCM pusema alima linüktem dang Mexico sorkar den amalitepa tebilemtsü onük balala bentettsü mepishir. Linük nung ochimashi lir, özüng alema tentetba telok balalai nisung, temesepba mozü aser raraba hadir shibelener, aser ibaji ajanga Khristan putir inyaktsü atema alima nung linük tamajungtibatem rongnung Mexico züngoker," ta lai ashi.

AO OSHI ANGAZÜKDAK:**TANÜ ANGAZÜKTSÜBA OJANG****Temelem**

(adj) tapu masü (thick)

* Asükwa sü temelem abener mejanger.

Temelen

(adv) ka tsüda tanga ka agütsüba (exchange, instead)

* Dokan nung aliba tula meshitak asüba agi temelen ka meshi.



Tir Yimyim

OLONG PAITEP # 7123

	1				2			3		4
5								6		
7			8							
								9		
		10								
11										12
					13					
					14					
15										

TIPLIN

1. Balaka
6. Aika shirangba
7. Tar tatsü
9. Nenü'er jabaso
10. Sen latettsüba
11. Tangar kübok alir
14. Lon nung inokba
15. Tzü ayimdak
16. Ajok

LANGTSÜNGLEN

2. Hai sür inyak
3. Aor tenüing ka
4. Ali telungi talangka lur
5. Tebang kenyongi mazüoker
8. Ken atema anenzükertem
9. Toktepa noktak
10. Sen
11. Benjong agi
12. Telung nung rizünga ayu
13. Tebang nung enok

OLONG PAITEP # 7122 TELANGZÜBA**TIPLIN :**

1. Semtu, 3. Lepko, 5. Bilem, 8. Ulu,
10. Tsünpang, 11. Tesangwa,
13. Aoksa, 15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER MA

Diriyah Co. ajanga "largest construction safety lesson" agiba atema Guinness World Record ka yangluogo. Iba company-i ayongzükba Wadi Safar development sentong nung 2,864 workers-i shilem agia liasü.

Iba sentong ya parnok headquarters nung Al-Rashid Trading & Contracting Co. den yaritepa ayongzük aser Guinness World Records ketdangsürtem aden.

Minute 30 session nung "Top Five Critical Safety Hazards in Construction" nung temulung agüja agi.

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Meitei nunger temeshi aini aoba atema security akangshir

Imphal, April 14, 2025

(Agencies): Meitei nungeri Thangjing foothills tashi kümshia temeshi aini aor aser taküm parnok April 14 nü parnok aika Moirang nung anenzükba ajanga Bishnupur aser Churachandpur district tem nung security kanga akangshia liasü.

Meitei nungeri Thangjing tesem ya kanga temeshi ama züngshir. Bishnupur district kübok Kwakta aser Phougakchai Ikhai nung security lemozüksü kechiyong Thangjing-i aodang item tesem adener.

Meitei nungeri kümshia April ita Thangjing Hill semdang. Imphal Valley nungi Meitei nungertem Bishnupur nung aliba

Thangjing temple nung sarasadem aser Moirang nung taonung yipzüksü.

Meitei nungeri kümshia temeshi aini aoba noktangtsü atema Deobarnü Kuki-Zo nung aika Churachandpur district kübok Thangjing Hill nung adenshia liasü.

Lungkak aitertermi tesem balala nung garitem nung mener Thangjing Hill-i aru.

"Shirnoki buffer zone adentsü merangdir ibaji Kuki-Zo nung jazükba ama asütsü aser mepetmesü kar danga atalokra parnoki tebilemtsü khuret abentsü" ta lungkak aitertermi ashi.

Manipur nung buffer zone nung Meitei nunger teimba ser

aliba Imphal Valley aser Kuki-Zo nung teimba ser aliba hill districts lir aser sepaitemi anüker.

Honibarnü Kuki-Zo telok balalai Meitei nunger dang Thangjing Hill-i maotsü tetuyuba agüja liasü.

Kuki nung telok 6-i Meitei temeshi aini aoertem Thangjing hills-i aruba noktanger.

"Ozüng mapa inyaksüla aser temzüngi melaba temetentem kümzüka ayutsüla. Meitei nung dang Thangjing hills-i temeshi aini maotsü amokmerenba ya freedom of free movement aser right to religious practices anema lir" ta Meitei Heritage Society-i metetdaksüogo.

Cachar nung WAQF lungkak aitba atema BNS section 163 benok

Guwahati, April 14, 2025

(Agencies): Assam kübok Cachar District nung tensa mejungi akümtsüsa akümba agi District Magistrate Mridul Yadav-i Bharatiya Nagarik Suraksha Sanhita (BNSS) nung Section 163 kübok tenokdangbatem agütsüogo.

Nübertemi WAQF Act anema lungkak aitba aser tensa mejungi akümtsü tsübuba agi April 13, 2025 nü iba lemtet agi.

Cachar Superintendent of Police-i district nung tensa mejungi akümtsü akok ta tebilemba lemsatepba sülen iba lemtet agi ta District Magistrate

Yadav-i ashi.

Iba tetuyuba ya Cachar district ajungalen benshitsü aser tanga sangdong ka magütsü tashi alitsü. WAQF Act anema lungkak aitba aser law & order tensa majungtsü ama bilemba agi iba tenokdangba agütsür ta pai ashi.

Tripura sorkari Bengali New Year nung jenjang dalang agi ango ayoktsü

Agartala, April 14, 2025

(Agencies): Tripura Fisheries Department-i Pohela Boishakh ta ajaba "Bengali New Year Day" nung jenjang dalangba nung angotem ayoktsü metetdaksüogo.

Department-i ango tapu balala seret 6,000 tashi ayoktsü lemtetogo ta Tripura Fisheries Minister Sudhangshu Das-i ashi.

Bengali New Year benjungmung nung senotsü kanga meindoktsü atema

department-i iba mapa inyaker ta Minister Das-isa metetdaksü.

"Bengali New Year mezüing anogo nung Bengali nungeri ango achir anungji department-i iba lemtet agiogo. Pohela Boishakh nung ango kanga sapua aliba ajanga jenjang kanga tur ayoker. Market nung jenjang metudaktsütsü atema department-i tesem 21 nung ango yokdoktsü lemtetogo" ta paisa ashi.

K e t d a n g s ü r t e m i Mongulbarnep 8:00 ako nungi department counters lapoktsü ta Minister-isa shisem.

Iba anogo Rohu, Katla, aser Curfew jenjang Rs 220 nungi Rs 350 tashi agi yokdoktsü.

Poila Baisakh ama nung nisungtemi Hilsa kanga sapua achir aser iba ango Rs 1,200 nungi Rs 1,500 tashi ayoktsü.

Agartala nung marine ango seret nung Rs 150 agi ayoktsü ta Minister Das-isa ashi.

MENUNGRA BILEMTETER

Lt. J. Imkong Amri , Sür küm ka ajunger
ASÜ : 15/4/2024



Na Tsüngrem den alitsü atema onok toksür or küm ka süiogo, saka nü ajemalu temeim, shisatsü aser tawabangba onok mulung nung teti alir aser iba ajanga onok ajungmesor.
Akmülidang tajangshibatam ajak onoki kanga menungra bilemteter aser na onok den maliba kanga meteter.

Temeim kinungtsü, chirnur, anükapang,
mezüngbuba aser tanabuba semchirtem.

ALI TAYOKTSÜ LIR

- 1. 3 Pura. Foothill road tangshia 150 per sq.ft
 - 2. Foothill anasa teak lu, 120 per sq.ft
 - 3. Showuba fly over anasa 190 / 250 / 310 per sq.ft
- ~ Contact : 9863826159

Algeria-i France nunger ketdangsürtem mintok

Algiers, Rongchii/April 14 (Agencies): Algeria-i France nunger ketdangsür ishika ghonda 48 tsünga linük toksür aotsü tetuyuba agütsüogo aser iba ajanga linük ana tsünga diplomatic tesendaktep anokshitsüogo.

France Foreign Minister Jean-Noel Barrot-i Hombarnü ashiba agi, iba tetuyuba ya taoba küm Paris nung Algeria sorkar critic ka pur aoba atema tawa nisung asem apuba dak sendaka lir.

Barrot-i, Algeria ketdangsürtem dang iba tetuyuba agütsüba ya agintsü shiogo aser ashiba agi, iba telemetba maginra France-ia tangsa tang telangzüba agütsütsüa akümtsü.

Diplomatic source kati AFP news agency dang ashiba agi, French Ministry of the Interior züngsem densema ketdangsür 12

nem linük toksür aotsü tetuyuba agütsüogo.

Taoba hopta France prosecutor temi Amir Boukhors pur aoba dak sendakba nung consular official ka densema Algeria nunger asem aitsüogo.

Pre-trial nung yua alirtem ya kiralongrar inyakyim atema obendangdar. Algeria sorkar anemsang social media influencer ya TikTok nung "Amir DZ" tenüng nung lir aser pa follower million ka dak tema lir.

Boukhors, shiba nem France-i 2023 küm tejenokdak agüja liasü, pa taoba küm April ita Paris suburb nung apu aser anogo ka lir chioka liasü, ta pa oksüri ashi.

Algiers-i pa ya obendangtsü atema meyipa yoktsü takhangba agüja arudar. Pa ya ochi mashi ken o aser kiralongrar inyakyim atema international arrest

Zelensky-i Trump dang Ukraine semdangtsü mepeshi

Kyiv, Rongchii/April 14 (Agencies): Ukraine tir Volodymyr Zelensky-i, rara anendaktsütsü atema Russia den tenangzüktepba kecha meyanglu tsünga Ukraine semdangtsü Donald Trump jaokogo.

"Telemetba kecha magi tsünga aser sensaksem maka tsünga aruaki raksar aliba mesüra sür aliba nüburtem, sepaitem, mozükitem, tenlakitem tanurtem reprangdangang," ta Zelensky-i CBS indang 60 Minutes programme atema interview ka nung ashi.

Russia-i missile amshia Sumy yimti maka nisung 34 tepsetba den nisung 117 miyirutsü tsünga iba interview ya mangaoker liasü.

Iba dak sendakba nung



Russia-i kecha telangzüba magütsü. Trump-i ashiba agi, iba yimti amakba ya aibelen ka liasü ta pa dang shiogo ta ashi, saka iba osang ya Moscow-i agütsü asü masü mejangja. Germany indang taruba chancellor Friedrich Merz-i rara nung aibelenba atema Russia aitsüogo.

Trump kübok rara tembangdaksütsü atema US-i achaayanga sensaksema aliba mapang ka nung iba yimti makogo.

Yimti amakba indang jembiba mapang US tir-i, yimti amakba ya kanga majung aser parnoki aibelen mena ta shiogo, ta ashi, saka iba dak tali mashi.

Ukraine dangi Trump indang special envoy Lt-Gen Keith Kellogg-i ashiba agi, iba yimti amakba ya aibelen tulu ka lir.

Zelensky-i Trump jaokaka pai Ukraine semdang mesemdangtsü mejangja.

Trump indang team nungi lenir tejentem rongnung US treasury secretary Scott Bessent kijai Kyiv semdanga lir. Ukraine indang mineral dak

sendakba nung tenangzüktepa yanglutsü atema pai Kyiv semdang koba Zelensky-i magizüki liasü.

Ukraine tiri ashiba agi, ceasefire benoktsü atema US-i Moscow den tesendaktep yanglushitsü merangba mapang ka nung Russia-i civilian tem maneni makdar.

US special envoy Steve Witkoff-i Vladimir Putin den asemben ajurutepogo.

Deobarnü Sumy yimti amakba ya Europe nung lenirtemi aitsüogo. Merz shiba taruba ita Germany indang chancellor akümtsü imlar, pai linük public broadcaster ARD dang ashiba agi, iba ya rara nung aibelen tulu ka lir.

Germany indang Chancellor Olaf Scholz-ia, iba yimti amakba ajanga yimjung atema Russia koda renema ali aji sayur, ta ashi.

France tir Emmanuel Macron-ia, nisung taküm hau ta maliba, international temzüng ozüng nung aibelenba aser Tir Trump-i yimjung atema merangdanga aliba hau ta maliba atema Russia aitsüogo.

Taoba South Korea tir Yoon-i pa aitsüba magizük

Seoul, Rongchii/April 14 (Agencies): Mapa nungi anentsür aliba South Korea tir Yoon Suk Yeol-i sorkar anema nokdakba atema pai aitsüba magizük.

Seoul Central District Court nung Hombarnü obendangba mapang pai taoba küm martial law benokba ya coup ka masü ta shiogo. Iba ken o nung aibelenba ngutetra Yoon ya taküm tepeyong tepuokdak ayutsü mesüra tasüba agi merenshitsü.

December 3 nü martial law sangdongba dak sendakba nung MP temi impeach sütsüba sülen Yoon ya iba ita office nungi aginogo.

Prosecutor temi, martial law sangdongtsü Yoon asoshi temzüng ozüng dak tamendakdak peria maliasü, ta ashiba den pai parliament amala state institutions tem lemta kümdaktsütsü atema merangba atema pa aija liasü.

Yoon, shiba tir makümdang linük indang chief prosecutor liasü, pai iba taitsüba anema minute 40 shi jembia liasü.

"Martial law ya coup d'etat ka masü," ta taoba tir yagi ashi. Paisa, linük lemta kümdaktsütsü atema pa tebilemba kecha maliasü, saka majority opposition party



inyakyimtem indang nüburtem nem metetdaksütsü atema martial law nüngdaka liasü, ta ashi.

Pai ashiba agi, opposition-i ketdangsür 20 dak tema mapa nungi anenja sorkar inyakyimtem nung tetsükdaktsü adokdakja liasü, koba pai lendong ama bilema liasü.

"Iba ya linük dangi peaceful 'message martial law' ka liasü.... martial law ya anogo tesadang ka tsünga tembangtsü ta ni meteta liasü," ta Yoon-i ashi.

Ozüng benokba mapang pai iba mapang Minister of National Defence Kim Yong-hyun nem iba tebilemba ya metetdaksütsüogo, saka ketdangsüri tetuyuba benoka inyakba ya alimela jenjang agiba ama liasü, kechiyong parnok guideline balala kübok martial law

atema trining agia lir, ta Yoon-i ashi.

Martial law ya benoker ghonda trok dang lir agin. Parliament kong ozüng yanglurtemi martial law anema vote agütsüba mapang special operations sepaitem aitsü meranga, parnok ya parliament nung staff temi tenokdangba balala agüja aser fire extinguishers amshia nokdanga liasü.

Okadak military ketdangsür ana kuli angadangtsü, kong National Assembly nung martial law agintsü atema sentepa aliba ozüng yanglurtem atsütetstü atema temaba jenjang nung aliba ketdangsürtemi pa nem tetuyuba agütsü ta ashiba ketdangsür densema lir. Yoon-i iba taitsüba ya magizük.

Mongintemi ashiba agi, Yoon indang criminal ken o ya mapang talangka atsülanga aotsü.

Aibelenba aliba ngutetra Yoon ya sorkar anema nokdaksü merangba atema aitsüba South Korea tir tasembuba akümtsü. Pa tasüba agi meenshitsü akok, saka South Korea-i 1997 küm tasüba agi merenshiba dak sendakba nung unofficial moratorium ka benoka lir, anungji pa nem iba temerenshi yabo magütsütsü imlar.



METETDAKTSÜR

- 1. North Eastern region nung wide band Communication expansion plan kübok Fiber Optic Communication system amenoktsü atema 2024-29 tariff block asoshi 2019-24 Transmission tariff aser transmission tariff determination atema petition jaoker.
- 2. Temalen shisema aliba Transmission system beneficiary temji: (a) Assam Power Distribution Company Limited (b) Meghalaya Power Distribution Company Limited (c) Government of Arunachal Pradesh (d) Power and Electricity Department, Mizoram (e) Electricity Dept. of Puducherry (f) DOP, Nagaland (g) TSECL.
- 3. Tariff details:

a) 2019-24 block					2019-20				
Petition No.	Asset detail	DOCO/Effective	Completion Cost as on 31.03.2024		2019-20	2020-21	2021-22	2022-23	2023-24
Petition-1	Asset 1	01.04.2018	329.24	Revised AFC based on trueing up	58.32	60.33	64.98	67.49	67.35
	Asset 2	30.06.2020	2666.02		-	364.70	524.93	555.91	559.42
	Asset 3	19.03.2021	356.14		-	2.12	65.76	72.67	77.66
	Asset 4	19.03.2021	1301.51		-	7.34	203.80	207.67	213.54
	Asset 5	19.04.2021	311.73		-	-	31.98	40.39	49.60
	Asset 6	20.04.2021	350.25		-	-	49.85	55.10	57.83
	Asset 7	11.05.2021	672.34		-	-	95.27	108.46	111.03

b) 2024-29 Block					2024-25				
Petition No.	Asset detail	Completion Cost as on 31.03.2023			2024-25	2025-26	2026-27	2027-28	2028-29
Petition-1	Combined assets under Central sector	3351.40	AFC		654.06	632.09	609.76	587.46	463.80
	Combined assets under State sector	2648.82			474.07	456.59	438.96	421.34	389.56

- 4. Tariff determination atema application copy ka applicant indang website www.powergrid.in nung inokja lir.
- 5. Petition nung tariff determination atema benokba nung teshidangtsü mesüra tashishitsü ka lira beneficiaries densema nisung masü kati Commission indang e-filing portal ajanga mesüra Secretary, Central Electricity Regulatory Commission, 6, 7th & 8th floor, Tower B, World Trade Centre, Naoroji Nagar, New Delhi 110029 (or other address where the office of the Commission is situated) dangi shiti zülutetsü, kong petitioner dangi iba address nung corporate office dangi copy ka osang agütsüba sülen anogo 30 tsünga yoktsüla.

Place : GURUGRAM
Date : 14.04.2025
Chief General Manager (Commercial/RC)
POWER GRID CORPORATION OF INDIA LTD
(A Government of India Enterprise)
Reg. Office : B-9, Qutab Institutional Area, Katwaria Sarai, New Delhi-110 016
Corp. Office : "Saudamini", Plot No. 2, Sector-29, Gurugram-122001, (Haryana) Tel. : 0124-2571700-719
www.powergrid.in, CIN : L40101DL1989GOI038121
A Maharatna PSU

Archery World Cup: Dhiraj-i bronze medal angu



Rongchii/April 14, 2025

(Agencies): Archery World Cup Stage 1 nung India team-i medal pezü ngua tembangogo, kong Deobarnü men's recurve team event nung silver medal anguba aser Dhiraj Bommadevara-i individual recurve category nung bronze medal anguba densema lir.

Arishi küm 23 tain Army archer Dhiraj-i bronze medal atema asaya nung 2-4 agi tesülen aliba nungi meyipa tur Spain nunger asayar Andres Temino Mediel 6-4 agi koka liasü.

Deobarnüsa pa ya Tarundeep Rai aser Atanu Das na den team final China den asaya saka asaya 1-5 agi mekoki silver dang ngua liasü.

Iba asayamung nung India

team-i medal pezü ngua liasü. Parnoki compound mixed team asaya nung gold, compound men's team event nung bronze, recurve men's team nung silver aser recurve men's individual (Dhiraj) nung bronze medal ngua liasü.

Compound men's individual section nung Abhishek Verma-i kanga meranga asaya saka medal monguteti pezübuba nung tembanga liasü.

Bronze medal atema asaya nung Dhiraj aser Mediel na mezüngbuba set nungbo 28-28 ta kasasa liasü.

Iba sülen Spain nunger asayar ya tanabuba set nung 29-28 agi tejakdang aküm aser 3-1 agi pa tejakdang liasü.

Tasembuba set nung asayar anapronglai point 29-29 angu

aser iba ajanga Dhiraj nem pressure agütsü.

Ajisüaka India nunger asayar yagi set pezübuba kanga junga asaya aser X nung khi kashiba densema 10 nung anaben kashia pa 29-28 agi tejakdang aküm aser asaya 4-4 ta kasasa liasü.

Deciding set nung Dhiraj-i pressure nung kanga süngjema asaya aser 10 nung asemben kashia asaya akok aser bronze medal ngua liasü.

Semifinal nung pa Germany nunger No 4 aser Paris Olympics silver medallist Florian Unruh-i 1-7 agi tsükdakja liasü.

India tebur recurve team nung Dhiraj, Tarundeep Rai aser Atanu Das nungeri China den gold medal asaya kanga junga tenzük aser mezüngbuba set 54-54 nung tembang.

Ajisüaka tanabuba set nung parnoki junga masayateti 8 nung anaben tashi khashia Li Zhongyuan, Kao Wenchao aser Wang Yan nunger 58-55 agi tejakdang aküm.

Tasembuba set akoktsü nungdaka asayaba mapang India nunger asayartemi ano 8 nung khi khashia parnoki asaya 54-55 agi mekoki China-i gold medal ngua liasü.

G. Rio Asayamung: Zunheboto-i wicket 4 agi Tseminyu kokogo



Dimapur, Rongchii/April 14

(TYO): Sovima Cricket Ground nung tang asaya aliba 5buba Late G. Rio Men's U19 Inter-District Cricket Tournament 2025 nung Hombarnü Zunheboto-i wicket 4 agi Tseminyu kokogo.

Asaya nung Yeshika Zhimomi-i bowling kanga junga aon aser par team-i asaya akokba nung pai tongtibang shilem agia liasü.

Toss koka mezüng batting amenba sülen Tseminyu team-i over 32.2 nung asaya ajak out sür run 79 yanglua liasü. Zunheboto team nungi bowler temi ball kanga junga aonba ajanga batter temi junga masayatetba mapang nung parnok rongnungi Sonyelo Kent-i dang tera junga asaya-a pai ball 34 nung run 27

yanglua liasü.

Zunheboto team nungi bowler tem rongnung Yeshika Zhimomi-i tajungba asaya, aser pai over 9 nung run 16 agütsür wicket 5 agia liasü.

Asaya akoktsü atema run 80 nungdaka tanabuba innings asaya tenzükba sülen Zunheboto team-i asaya tetenzüklen junga asaya saka tom nung asayar kar out süa liasü. Ajisüaka Abhi Das-i out mesüi ball 40 nung run 29 yanglua par team takok dangi ania liasü.

Tseminyu atema Sonyelo Kent-i batting dang junga amenba dang masü saka pai bowling-a junga ona over 7 nung run 25 agütsür wicket 4 agia liasü. Pai junga asayaka Zunheboto-i run ya over 19.2 nung menepa asaya koka liasü.

CSK-i Gaikwad melena Ayush Mhatre shimogo



Rongchii/April 14, 2025

(Agencies): Chennai Super Kings-i IPL 2025 nung tanungba asayatem atema captain Ruturaj Gaikwad melena arishi küm 17 tain Mumbai opener Ayush Mhatre shimogo. Gaikwad ya tekatsüla yiruba ajanga masayatetsüsa kümogo.

Gaikwad yiruba sülen Mhatre ya hopta ana tejakdang CSK-i trial atema jaok aser tang pa team nung anioxtsü telemtetba agiogo.

Mhatre-i tang tashi nung Mumbai tenüng nungi first-class asaya teku asayar aser iba mapang century ana aser half-century ka yanglur lir. Pa Mumbai tenüng nungi list A games tenet asayaogo kong pai Nagaland den asayadang run 181 yanglu aser Vijay Hazare Trophy nung Saurashtra den asayaba mapang run 148 yanglua liasü. Pa CSK team nung yakta adentsü, saka pa asayatsü maongka angutsü mangutsü mejangja.

Mhatre ya Mumbai Ranji Trophy team opener ama taoba küm Irani Trophy nung Rest of India den asayaba mapang

mezüngbuba asaya.

Yimti nung cricket asayartem aika ama paia tetsükdaktsü aika ajangshiogo. Pa aliba tesem ya Mumbai downtown nungi km 46 pilar lir anungji pa Oval maidan nung practice session atema 5 ako nung apusoba train aputsü atema 4:15 nung saksüsa aküm.

Pa batting amenba yimya ya kanga aggressive lir aser iba ajanga selector tem atsüa arua senior team nung züngoksemtsü. Pa arishi küm 13 asüba mapang local club Virar-Sainath Sports Club-i senior team nungi asayadaktsütsü atema telemtetba agia liasü, ibayongji pa tanür asüadang nungi tain den asaya aruogo.

"Ni küm 6 asüadang asaya tenzük saka arishi küm 10 asüadang shidakba cricket asaya tenzük," ta Mhatre-i taoba küm Indian Express dang ashi. "Ni Matunga nung Don Bosco High School nung admit asü aser kübu Laxmikant Naik (Nana)-i ni anogoshia anir senzüa liasü. Anungji anepdang ni Matunga nung practice asüi

ao iba sülen school nung aden aser maneni Churchgate nung ano practice ka nung dena liasü. Ozü kinungertemi kübou dang ni junga mejangdaktsütsü ashi, saka tangbo parnoki ni bendanga agütsüba angateter," ta paisa ashi.

Australia Tour atema India tetsür team sangdongogo

Rongchii/April 14, 2025

(Agencies): Australia nung oa asayatsü aliba asayamung atema Hockey India-i Hombarnü züngsem 26 agi kümtetba India tetsür Hockey team squad sangdongogo.

Iba asayamung ya Perth Hockey Stadium nung April 26 nungi May 4 tashi asayatsü. Asayamung nung India team Australia A den mezüng asaya ana asayatsü aser iba sülen senior Australian team den asaya asem asayatsü.

Team ya midfielder Salima Tete captain sür asayatsü aser forward Navneet Kaur Vice-Captain asütsü. Iba asayamung ya FIH Pro League 2024-25 nung European leg atema team asoshi renemshitsü atema kanga tongtibang asütsü, koba June ita asayatsü lir.

Goalkeeper tejen Savita aser lanur asayar Bichu Devi Kharibam na team nung goal keeper asütsü shimogo.

Defence nung asayar tejen aser tasentem meyoktepa liasü, kong Jyoti Singh, Ishika

Chaudhary, Sushila Chanu Pukhrambam, Sujata Kujur, Suman Devi Thoudam, Jyoti, Ajmina Kujur, aser Sakshi Rana nunger densema lir.

Midfield nung captain Salima Tete-i anir Vaishnavi Vitthal Phalke, Neha, Sharmila Devi, Manisha Chauhan, Sunelita Toppo, Mahima Tete, Pooja Yadav, aser Lalremsiami nunger asayaba angutsü.

Maneni forward nung asayatsü atema Navneet Kaur, Deepika, Rutaja Dadaso Pisal, Mumtaz Khan, Baljeet Kaur, Deepika Soreng, aser Beauty Dungdung nunger shimogo.

Temetetsü kaji Jyoti Singh, Sujata Kujur, Ajmina Kujur, Pooja Yadav, aser Mahima Tete nunger tang mezüngbuba senior team nungi asayatsü atema jaokogo.

Iba den bendenloksema Bansari Solanki (goalkeeper),

Anjana Dundung aser Lalthantluangi (defenders), Sakshi Shukla aser Khaidem Shileima Chanu (midfielders), den Dipi Monika Toppo aser Sonam (forwards) nunger standby player ama shimogo.

Team dak sendakba nung Indian Women's Hockey Team Chief Coach Harendra Singh-i pa tebilemba lemsatepa liasü. "Australia nung oa asayatsü aliba asayamung ya onok tasa aser sempettem tendangtsü atema maongka tajung ka asütsü. Onoki team nung asayar tejen aser tasentem meyioktepa shimogo. Lanur asayartem national level asayamung aser senior camp tem nung junga asayaba sülen team-i aitba ngua pelar. International jenjang nung panoki koda asayateter aji repringtsü jangrademtsüka asütsü," ta coach-i ashi.

BILEMDANGANG

"Tenüng tajung pei kisüng agitsü bilemerji kodanga lenir tajung masü".